

太上洞淵神呪經卷之七

始七

太上洞淵神呪經卷之七

始七

斬鬼品

道言自今壬午年三月至九月人民疫鬼殺
害十分殺三刀兵之世也六夷當死沙門法
變道炁日盛三洞流演中國之中浩浩日月
失度人民勤苦死者門門若有奉持三洞化
人受之有病轉經經神救人也此病可瘥若
自今以去有轉此經處吾遣十方力士化喻
疫鬼一切邪精令收此之鬼病人得命瘥愈
無他有囚繫徒刑自然解了若不蒙息魔王

先坐斬之不怒矣

道言甲戌之後有三千六萬三足鬼身長九
丈手把赤棒入人宅中行六十二種病病殺
惡人鬼名曲寅谷各有三百六十縱眼鬼鬼
目悉赤或乘風雲專取人命暴殺六畜千二

始七

百青疫鬼疫鬼兄弟八千萬人男女之鬼日
有九億來入人舍宅伺人小口令人卒死復
有兩頭鬼鬼名當進當進暴虐常恐百姓百
姓得病此鬼妄食人猪雞詐作大神欺誑愚
人愚人信之殺六畜享祀此鬼此鬼得便因

成習俗若乃不得便生病痛自今以去有奉
此經之者吾當遣三萬九千天丁和喻此鬼
等令斥去千里若不去者三天大魔王及十
方主者斬之萬段終不恕矣

道言壬午年已有三十六種大鬼鬼名黑頭

然又名赤蓋三名阿駒各各將三萬九千人
齊執白棒殺鬼之刀刀長七尺入人宅中專
取人命行百二十種病病殺惡人有六十種
惡氣入人身中令人卒死自今以去有如此
病者得三洞之師轉經行道之處悉令得瘥

若復不降令生人病不損官事不了者大梵
天王等及十方主者斬之不恕矣

道言若壬午年已有三萬七千赤鳥行三萬
九千種病病殺惡人復有八十二種病不利
惡人若得此病時有三洞法師轉經行道者

始七

二

可得瘥耳若轉經行道者三十六梵天天王
來助護子等也疫鬼之兵自然消散若不去
者我遣三天力士十萬赤壞兵收而斬之道
士既奉三洞者但急化一切人入道天人亦
喜若壞一人善心天人誅汝汝不得人身何

有仙也自今以去若有救療病人之處天人
自來佐護子耳三天玉女要進五千萬人一
合來下與麻姑遊於杜陽山過歷五岳見天
下之人疾病死亡不唯一人玄女驚曰咄咄
天災人民死盡當奈何救之手相與悲嘆來
詣玄都具白太上太上曰汝等往世間化一
切人令奉三洞三洞之經能度衆生諸難如
汝等悉來國土化人經典乃能敬信有病官
事爲之轉經轉經一宿死人更生官事自解
若自今以去有法師救人之處我當遣天人

化喻之疫鬼自然去矣

道言此三女兒者先身有大福今得爲聖女
教化一切人十方之尊大也一日百變久莫有
及者矣今後世人有聞見此三女名字者此
女等亦來救子也若有疾病官事者轉誦此

始七

三

經十方大神自來救之耳不令有惡也子等
若有化人之功天自知之矣

道言自庚辰年已有九十億萬黑殺鬼鬼長
六丈各將八萬四千小鬼赤頭疫鬼來伺人
鬼名盈女悉赤目專行十方入人宅中取人

小口行百種病殺人自今以去有法師轉此
經治病之處疫鬼急去千里若不去者三天
大神喻之若復不去力士縛之不得復恕矣
道言壬午年三月十月有赤天疫鬼十二萬
頭各各領三萬九千力士大兵復有七十萬
黑尾鬼鬼名蛇舍悉有八萬六千從上來下
殺滅惡人若自今以去有急病之處道士經
行救人之者此鬼收却縛之若復不去三天
力士必斬之耳須臾九天力士亦斬殺之不
復恕矣

道言自今以去有八十萬三足鬼十二頭疫
鬼鬼來殺人行七十九種病有得三洞法師
行道之者此等鬼自然天人收却之若復不
去三天力士必斬之耳終不怨矣

道言辛巳年九月有三千萬赤目鬼鬼名角
子各將四十九億小鬼鬼來殺人人有值此
病者急求三洞法師師來入宅鬼亦自去若
不去者天丁力士九十萬人次次斬之終不
怨矣

道言甲午之歲有八千萬小陵鬼鬼名赤頭

各各自將八十萬人下行九十種病病殺惡
人令人臃腫瘡疽病若自今以去有法師救
病之處此等鬼自伏速走萬里若復不去者
三天力士當斬殺汝無有遺脫也道士化人
令此鬼自去矣

始七

四

道言自庚辰之年到壬午年九月十月人多
有病有九十三萬黃身鬼名百龍各各自有
十二萬玉來下病人自今以去若法師轉經
之處此鬼自去若不去者天丁力士三天大
兵來共斬之九天魔王將汝治罪矣

道言自今辛巳壬午年有九十六種殺鬼鬼
來殺人村村有四十六萬黃癩鬼來入人村
令人吐血下痢霍亂卒死心痛身染苦病咽
喉塞痛以致死亡若有得法師經行救者三
天大神和喻此鬼令斥去他方萬里之外若
有不去者此鬼等頭破作十六分矣三天大
兵九天力士終不置汝也道士化人喻鬼矣
道言自火漢之後有五通大鬼鬼名王翦白
起韓章樂陽楚狂又有郝景女媧祝融三萬
九千人各領八億萬人此鬼從伏羲以來帝

王相丞此大鬼主召領十二萬人天下小鬼
依憑求食與其鬼王作兵來耗動萬民萬民
患之各各伺人家取人男女疾病急厄口舌
官事水火千萬為衆枉其良民病殺無辜誑
斥家親催促竈君令人宅神不安每事不果

始七

五

行萬種病病痛急疾乘風駕雀妄作光恠自
頃以來不唯一條今遣正一功曹大明使者
驗神使者各領鐵面騎吏九億萬人手持大
戟殺鬼之具太上強力健士四十九萬人一
合下來收捕此土國中死將之鬼一切魔邪

百千萬魅不正之殫來害生人之家者一一
收捕打殺之令蕩除宅中殺鬼鬼王等悉加
用力次次縛之若有一鬼不去者鬼王等千
斬不恕急急如律令

道言國土有大鬼主鄧艾鍾士季趙山王莽

李教杜周劉斗烏王離夏侯嬰蔣公琰南陽

葉公里夏檀支蕭何申屠伯韓信田進梁洪

高沛孫溫司馬迥劉元達有此大鬼主令世

人或有祠祀武帝文王世間供養立祠不絕

各各有兵馬爲天下人作崇崇病殺人年年

月月行千萬種病或四支沈重寒熱下痢腫
腫水腹黑病頭目悉痛脊背燠熱或有黃瘰
瘻欬咽喉不通一切萬病殺人無度矣

道言此等之人皆悉是往時大將任事之人
死亡之後各有人立祠祀之不止今傳有百

鬼附之唯成大衆仍伺人形便殺害百姓令
人水火口舌官事萬凶凶來奄殺人口多死
從來非一今遣赤盧大禁兵身長萬丈八十
萬人各領三億萬衆來下收捕此等之鬼王
得便斬殺之不恕矣

道言今此三洞法師轉經救人之處當令神
兵九萬億人護此生人之家大小口數若有
疾病官事刑獄之者一一令解了得出病愈
無他無他之日鬼王上遷若不瘥令危厄者
大魔王毛帝等頭破作九十分矣

始七

六

道言自今有病者及轉此神呪經之處當遣
萬和力士四十萬人百舌吏三十六萬人為
此主人疾病之家刑獄囚徒之人和喻家親
太祖父母內外殃殍及祠之者不祠之者悉
為分別遣之悉令了了又造刑獄之鬼皋陶

木索之君十二令吏八十九萬將一切長侯
三公九卿上下大夫十方主者急開獄門出
其囚繫之人迴化和喻令時君歡喜放之令
出亡人上遷去離三塗得在道鬼輩中逍遙
無為祐利生人疾病除瘥萬事解了自今吾
與鬼王判決若復不瘥者大魔黎洪等頭破
作三千五百分矣

道言告大魔王伏仁今有生人疾病困苦四
肢八體口喉不利頭痛目眩背燠疼手足
不拘五臟焦然氣來愴心厭厭不樂目不能

開不用飲食但欲吐逆夢寤不靜但與死人
相逐內外大小元元恐不全生死之期奄
至不久今告丹誠哀情可愍今遣大殺侯王
大兵八十億萬人候取地下鬼兵疾病生人
之家者為是何鬼若生人太祖父母不應來

始七

七

崇若非所祀自有所係若是社竈祠者有時
若是宅鬼不應害人今世清吉鬼不得妄來
若有宅中故氣四向殃殍一切惡鬼山林池
澤之鬼一一枚之付三天地獄鬼律女青詔
書治之不得令來急病良善也自今以去急

收汝下鬼若生不瘥官事不了大魔王千斬
之必不怒矣

道言甲子旬年八十萬赤病鬼殺人三十六
萬黑鬼鬼王各各將六夷之鬼十二萬人入
人家宅令人寒熱浮腫四肢赤熱不宜小兒
產婦暴死三公自罰天下流亂水旱不調瘡
鬼但來捕人國主自病坐有枉濫萬民嗷天
天怒遣三萬黑面小鬼殺人汝等欲得免此
鬼苦者各各受三洞真經若有受一將軍錄
者鬼不敢妄殺人也

道言有病人之家若有犯入刑獄元元恐死
者當先立此齋齋官或三人五人十人八人
張好籍帳若淨室之中備安三寶香燈供養
之具令辦集淨潔請三洞法師法師中務取
一人聰明了了分明者為法師與主人唱道

並安二高座高座上一人稱揚聖號為其主
人其餘道士次次旋行耳高座上法師執步
虛唱和座下人旋行徐徐高越而望天聽雲
中鴻聲若聽嘹嘹之響似玄景之宮天人之

歌矣

道言有病之家轉此經處一切大魔王與小
鬼王誓曰自今有人作齋行道救治病人病
人甚危兼有口舌官事刑徒囚繫等令差召
喚萬鬼對之何鬼爲也汝促驅之令自然得
瘥官事了了百願從心無他之日大鬼小鬼

始七

八

悉令上遷耳若自今以去官事不解疾病不
愈者大魔王及小鬼王斬之不忍矣

道言甲戌之旬年有三千九百白鳥來下行
病病殺惡人國中大小男女卒死多有瘟氣
八十種病古之死將孟達馬援李卿王鳳閻

振左丘盜者魚父華元吉成洪等各領千萬
人專行下赤痢病令人少氣宅中不安倚人
門戶取人小口恐人家親家親畏之遂令仕
宦不遷宅中虛耗口舌妄起觸物不吉連遭
刑獄囚繫來乂田蠶不得萬願不果悉是此
等鬼王不攝縱其下鬼令生人如此自今以
去各各執持汝等鬼兵勿令暴虐當令生人
官事了散疾病輕瘥輕瘥之日汝等上遷若
一旦不瘥汝等萬斬頭破作八十六分矣
道言甲申之旬歲中有大災起西北水來疾

病人死十中有八九耳三千九萬赤鬼專來
病人病人身黃不宜婦女小兒也時國主往
往有信法受持經書者度矣疫氣熏蒸三千
九萬種病殺人人有入山者千千萬萬矣人
民不安刀兵疫鬼殺人殺人無道天遣赤卒

姓七

九

七十萬人手持銅戟斬殺邪鬼收世間一切
殃殍三天大魔王若有枉殺之者各各斬此
大魔王烏丸等不怨之矣促去萬里急急如
律令

道言世多惡人天遣力士誅之先問其惡也

天兵大衆何可制乎但道士轉經救之者令
生勿復殺之也若自今以去天下有人疾病
及其刑獄囚徒道士行章轉經救療之處大
魔王與小鬼王助救之令瘥萬事了了若有
不瘥不解口舌連綿大鬼義真等斬之萬段
一一不恕矣急急如太上口勅律令

道言大門鬼吏大真公小門鬼吏小真公房
守門吏衣文後守門吏萬倫竈門守吏炎景
道上守吏尸供内外大鬼宅中殃殍男女客
亡水火金木之所殺害者各各自約今何鬼

來病生人人今危厄太上遣力士赤卒殺鬼
之衆萬億執刀縛鬼鍾馗打殺得便付之辟
邪所付與天一北獄恐其有枉令勅下萬民
若有疾病生人之家者速令放之令如法使
生人病愈人鬼無他若復不出者令病人不

癡大魔王小鬼王等身斬百碎必不怨矣一
一如太上口勅不得留停急急如律令

道言世人今多疫氣惡死自今以去與魔王
夏銀烏丸烏延赤波洪丘等誓曰今世多病
罪人死至不覺不知自度吾今令三洞法師

化示愚人愚人往往有一人信者男女之官
世間持此呪文民間齋講一日夜六時行道
布施禪思有此之處汝等鬼王助化愚人莫
令疾病疾病瘥愈勿令百邪干之也一一如
吾言可得上遷若不信吾教汝等頭破作十

始七

十

分矣不怨之也一一如太上口示律令

道言甲午之旬年多有六夷氏獠羌胡之鬼
流行行萬六千種病病殺惡人大災不安人
民危厄瘟氣多女人死鄧艾鬼王與劉斗烏
亦來行十二種下痢病土公殺人神龍上天

大水來至五行不運鬼賊害人人多暴死死
不以理自今以去太上與大魔王三十六王
荀谷等十二萬鬼主自今以始若有男女之
人家有病者汝等爲却之令官事解散人民
安泰一旦不如法汝等先斬萬碎不恕矣一

一如女青詔書口勅律令

道言大運交會鬼兵縱洩汝自今以去天下
之人男女疾病引日沈困者一切惡鬼家神
不佑人爲山林百邪所害者一一令瘥愈勿
伊枉命也若自今以去故令枉死妄天人命

者大魔王及小鬼王汝一一斬首萬段以謝
枉愆如太上口勅不恕之矣一一如鬼律收
付天一北獄治罪急急如律令

道言自今以去有八十萬三足鬼十二頭疫
鬼來殺人行七十九種病病人有得三洞法

始七

師行道之者此鬼等自然天人收去之若復
不去三天力士必斬之耳

道言三界之中大魔王領三十六小王王有
四十八億小王王有無數大兵橫行天下令
與吾共擔一治百姓不得枉濫妄誅無罪之

人因此凶衰為作祟也自今以去世間有急
疾官事危厄之者一一往視之助之福力迴
化口舌國主大臣一切惡鬼悉使歡喜令疾
病除瘥官事解了門族和睦天下安穩五穀
豐熟君民忻悅鬼兵自伏無病無痛萬願從
心如此之者鬼王等上遷天人悉喜若令風
雨不時五穀不熟人民不安國主暴逆官事
不了疾病不瘥者汝等大魔王及夫人百億
鬼王等悉以斬之矣

太上洞淵神呪經卷之七



